



Hans Moser ha buca tralasciau da sefatschentar cun il svilup da sia patria pli stretga.

FOTO A. CADONAU

Furbaz cun egliada critica

In schatg dall'ovra da Hans Moser ei exponida a Laax

■ (anr/ac) El vala buca sulet sco meister dalla plema, il cartoonist Hans Moser. La Fundaziun Pro Laax undrescha l'ovra dil convischin da Laax cun ina retrospectiva el Center da cultura, lungatg e formaziun. La vernissascha dall'exposiziun che dat in schatg dall'ovra da Hans Moser ha carmalau dabia gliedud la sonda passada el Center da cultura, lungatg e formaziun a Laax. Ina preschientscha che dat perdetga dalla reconuschientscha ch'il caricaturist gauda aunc adina tier ina gronda part dalla populaziun. Memia presentas ein sias caricaturas publicadas sur decennis en gasettas ed illustradas en Svizra sco era egl'exteriur. Ina ferma e cuntinuada preschientscha ha el gudiu durant biars onns el «Nebelspalter». Ina egliada en sia ovra exponida a Laax lai encorscher l'egliada critica, gie bunamein visiunara, da Hans Moser pertuocent il svilup da societad, ambient e politica. In'egliada drizzada era viers sia patria eligida da Laax e contuorn. Sia ovra lai denton era encorscher il fin humor ed ina gronda sensibladad dad in um cun in ferm maun creativ ed cun ina biografia varionta. A caschun dall'avertura dalla retrospectiva

la sonda passada ha Corsin Caduff dalla Pro Laax lu era schau repassar il puncts impurtonts dalla veta da Hans Moser. Naschius en Svizra igl onn 1922 ed emigraus cun ses geniturs ella vegliadetgna da sis onns el'America. SEMPLA ei la situaziun economica bein buca stada durant il temps dalla gronda depressiun dils onns trenta. Suenter la mort dalla mamma ei la famiglia Moser seretratga el stadi da Tennessee. Leu ha Hans Moser empiriu d'enconuscher il rassissem e la spartgida da ner ed alv. Mo era el valeva en in stadi dil sid sco «Yankee» dil nord ed aschia per secunda garnitura. Per untgir il maltractament da ses conscolars ha Hans Moser fatg diever da siu humor. Il narr gauda in cert schurmetg. Era sche Hans Moser, sco possessur dad in pass svizzer, havess buca stuiu. El ei s'annunziaus ord libra veglia per il survetsch militar ell'armada americana per la Secunda uiara mundiala. Sco schuldau ha el battiu encunter ils Japanes e pli tard ell'Italia encunter schuldada tudestga. Durant ils cumbats egl'Apennin ei Hans Moser vegnius blessaus. Ils schabetgs d'uiara fatschentan Hans Moser aunc adina. Las experiencias dil singul schul-

dau ein in bionton pli crudeivlas ch'ils extracts dils cudischs da historia. In encarden dall'exposiziun a Laax e dedicaus a quei temps. Turnaus dall'uiara frequentata Hans Moser ina scola d'art a New York, vegn a Paris, vul visitar cuort sia patria e resta pli gitg. El absolva ina scola d'art a Lausanne ed igl onn 1948 vanda Hans Moser sia emprema caricatura ad ina gasetta per 10 francs. El anfla spert editurs per sias numerusas caricaturas e quei ellas meglieras gasettas en pliras tiaras. Suenter ina dimora a Kopenhagen seferman Hans Moser e sia famiglia igl onn 1966 a Laax. Buca sulet sco caricaturist ha Hans Moser retschiert gronda reconuschientscha. Era sias publicaziuns e columnas tradeschan ton in spert serius sco il furbaz. Corsin Caduff ha titulau en siu plaid d'avertura Hans Moser per viandont tras las culturas cun la pussevkladad da delectar, far surrir e responder in amen gliedud da differenta cultura.

L'exposiziun dallas ovras da Hans Moser el Center da cultura, lungatg e formaziun (anteriur hotel Arena Alva) cuoza entochen ils 16 d'october. Ella ei aviarta il gliendisg entochen il vendergis dallas 8.00–12.00 e dallas 14.00–18.00.